
Mwasi

Yango

Yezabele

na

Rev. William Marrion Branham

Mwasi Yango Yezabele

MPAMELA



Emoniseli: 2:20: “Kasi nazali na yo likambo oyo ete opesi nzela (kolingisa) na mwasi yango Yezabele, oyo akolobaka ete ye mosakoli, pe azali kolakisa pe azali kozimbisa baombo na ngai ete basala pite pe balia mbeka na bikeko.”

Sikawa na eteni oyo nakolinga ete bokita na eteni ya 23 pe bomona etaliseli ya bosolo monene oyo nazali kobenda bokebi na bino likolo na yango uta na ebandeli. “Nakoboma bana na ye na liwa. Boye mangomba nyonso bakoyeba ete Ngai nazali Moto oyo atalaka na se ya mitema, pe oyo ayebi makanisi na bato.” Nazali kokoba ntango nyonso koloba ete solo mpenza mangomba mazali mibale, atako Molimo azali koloba na yango mibale na eleko moko na moko, lokola nde ezali bobele *moko*. Awa elobami polele ete ezali *mangomba*, pe elobami lisusu polele ete mangomba mosusu kati na yango, na solo mpenza, bayebi TE ete Ye azali Oyo atalaka na nse ya mitema pe ayebi makanisi ya bato. Akotalisa bango ete ezali bongo. Na bongo, mangomba nini yango oyo bakoyeba solo oyo te? Na solo mpenza ezali etonga ya mowiti ya lokuta mpo ete bandimi ya solo bayebi na bolamu ete kosambisama ebandaka na ndako na Nzambe, pe lokola babangaka Nzambe, bamisambisaka bango moko mpo basambisama te.

Bongo mpo na nini Nzambe azali kobenga mangomba oyo mangomba na Ye atako bazali mowiti ya lokuta? Bosolo na likambo yango ezali ete bazali Baklisto. Kasi bazali Baklisto ya Molimo te. Bazali Baklisto ya mosuni. Balati Nkombo yango se mpamba. Malako 7:7: “Bakosanzolaka ngai mpamba, bakolakisa malako mazali mibeko na bato”. Bazali mpenza Baklisto soko bongo te bakozala lisusu ba nani? Mizilima azali se Mizilima. Yango nde losambo na ye, lolenge azali kobikela yango ezali na ntina te mpo ye andimi malakisi oyo ya Korani. Motindo moko Moklisto azali Moklisto wana ezali ye kondima ete Yesu azali Mwana na Nzambe, abotami na mongondo, abakamaki na ekulusu pe akufaki pe asekwaki, Azali Mobikisi ya bato, pe bongo

na bongo. (Na solo, kati na Eleko na Laodikia ekozala na bato mosusu oyo bakomitanga Baklisto mpo ete bazali kondima mabongi kitoko ya Yesu, nzoka nde bamipesi makoki ya koboya Bonzambe na Ye. Bato ya Science Chretienne basila kosala yango motindo moko na ebele ya bato oyo bazali koteya Nsango–Malamu ya kosepelisa bato). Azali Moklisto ya nkombo pe azali moto na lingomba. Kasi azali mondimi ya SOLO to ya Molimo te. Lolenge ya mondimi oyo ezali moto oyo abatisami kati na nzoto ya Klisto pe azali enama na Ye. Kasi ata bongo, ezali na molongo ya Nzambe ete matiti mabe ekola elongo na mbuma malamumu pe basengeli kopikola yango te. Yango ezali mobeko na Nzambe. Mokolo na bango ya kokangema pe kozikisama ezali koya; kasi ekoki naino te.

Na bongo Molimo azali koloba na etonga oyo esangisami. Na ngambo moko Azali kokumisa, pe na ngambo mosusu Azali kopamela. Alobi oyo ya malamumu na bandimi ya solo. Sikawa azali kokebisa mowiti ya lokuta na oyo asengeli kosala soki asengeli kotelema sembo liboso na Nkolo.

MWASI YANGO YEZABELE

Ntoma Yakobo alakisaki biso nzela oyo lisumu elandaka. Yakobo 1:14–15: “Moto na moto akomekama mpo na kobendama pe kolengolama na mposa mabe na ye moko. Na nsima, esili mposa kozua zemi, eboti lisumu, pe esili lisumu yango kokola eboti kufa.” Sikawa tala elilingi mpenza ya likambo oyo ezali kosalema kati na bileko na lingomba. Lokola lisumu ebandaki bobele na mposa moko, ndenge moko kufa kati na lingomba ebandaki na mwa misala mike oyo bakebaki na yango mpenza te ya Banikolaiti. Kolongwa na misala ekomaki mateyo. Kolongwa na mateyo esanganaki na nguya ya leta pe bopagano ekotaki. Sikawa kati na eleko oyo ekomi kino kozua mosakoli na yango moko ya mwasi (molakisi) pe bongo ekobaki mobembo kino ekomikotisa na libeke ya moto, mpo ezali mpenza kuna nde epai wapi yango ekosuka, na kufa ya mibale.

Nzoka nde koganga nyonso Nzambe azali kotelemela eleko oyo ya minei ezuami na bofundi na Ye mosakoli oyo ya mwasi, Yezabele. Pe

mpo na kososola malamumu mpenza mpo na nini Afundi ye boye, tose ngeli koluka lisolo na ye kati na Biblia pe ntango tokomona nini ye asalaki kuna, tokoyeba nini ekosalema na ntango oyo.

Eloko ya liboso pe ya motuya mingi oyo tokoyekola na ntina na Yezabele ezali ete azali mwana mwasi ya Abalayama TE, ata kokota na ye kati na mabota ya Yisalaele esalemaki te na nzela ya molimo lokola oyo ya Luta, oyo ya Moaba. Te mesie. Mwasi oyo azalaki mwana ya Etebal, mokonzi ya Sidona (I Mikonzi 16:31), oyo azalaki nganganzambe ya Astarte. Akomaki na bokonzi na nzela ya koboma mokonzi Pheles oyo azalaki liboso na ye. Na bongo tomoni mbala moko ete azalaki mwana mwasi ya mobomi. (Likambo oyo ezali kokanisela biso mpenza Kaina.) Pe lolenge akomaki moko kati na Yisalaele ezalaki na nzela ya molimo te ndenge oyo Nzambe abongisaka mpo na kokotisama ya bato na Mabota; kasi akotaki na nzela ya LIBALA na Akaba, mokonzi ya mabota zomi ya Yisalaele. Nzoka nde lisanga oyo ndenge tomoni yango ezalaki ya Molimo te; ezalaki ya politiki. Na bongo mwasi yango oyo amikotisaki mobimba kati na kosambela bikeko azalaki ata na mwa mposa moko te ya kokoma mosambeli ya Nzambe Moko ya Solo, kasi ayaki nde na mikano polele ya kotangola Yisalaele mosika na Nkolo. Nzoka nde Yisalaele (mabota zomi) basilaki koyeba eloko nini kosambela bana ngombe ya wolo, kasi naino bamipesaki mobimba na kosambela bikeko te, mpamba te bazalaki kosambela Nzambe pe bazalaki kondima mobeko na Mose. Kasi kobanda libala ya Akaba na Yezabele, losambo ya bikeko epalanganaki na lolenge ya liwa. Ezalaki na ntango mwasi oyo akomaki nganganzambe na batempelo oyo atongelaki Astarte (Venus) pe Bala (nzambe moyi) nde Yisalaele akomaki na lolenge ya mabe koleka ya bomoi na ye.

Na likanisi oyo tokoki sikawa kobanda komona eloko nini Molimo na Nzambe azali kotalisa na eleko oyo ya Twatila. Yango oyo.

Akaba abalaki Yezabele pe asalaki yango na mayele mabe ya politiki mpo na kolendisala bokonzi na ye pe kobatela yango. Yango mpenza nde oyo lingomba esalaki ntango ebalanaki na eleko ya Constantin. Bango mibale basanganaki na ntina ya politiki, ata bapesaki yango lolenge ya likambo ya molimo. Moto ata moko te akoki kondimisa ngai ete

Constantin azalaki Moklisto. Azalaki mopagano oyo amilatisaki mposo ya Boklisto. Atiaki bikulusu ya mpembe likolo ya nguba ya basoda. Ye nde mobandisi ya bamati mpunda ya Colomb. Atelemisaki ekulusu na songe ya ndako ya nzambe St. Sophie, pe ekomaki momeseno.

Ezalaki likanisi ya Constantin ete bato nyonso basangana, bapagano, Baklisto ya nkombo pe Baklisto ya solo. Na ntango moko emonanaki lokola alongaki mpamba te bandimi ya solo bayaki na kolikia ete bakozongisa na nzela baoyo batangwaki mosika na Liloba. Ntango bamonaki ete bakokoka kozongisa bango kati na solo te, batindamaki na makasi ete babima na makambo ya politiki. Bongo ntango basalaki yango, babengaki bango batomboki pe banyokolaki bango.

Botika ngai sikawa koloba ete likambo yango moko ezali kosalema na ntango oyo. Bato nyonso bazali kosangana. Bazali kokoma Biblia moko oyo ekosepelisa moto nyonso, ezala Moyuda, Mokatoliko to Missioni. Bazali na likita na bango moko ya Nicée kasi babengi yango lisanga ya Mangomba. Boye boyebi banani bibongiseli oyo nyonso bazali kobundisa? Bazali kobundisa Bapentekotiste ya solosolo. Nalobi te ebongiseli oyo ebengami Pentekotiste. Nalobi baoyo bazali Bapentekotiste mpo ete batondisami na Molimo Mosantu pe bazali na bilembo pe makabo kati na bango mpo ete bazali kotambola kati na solo.

Ntango Akaba abalaki Yezabele na ntina ya politiki atekaki makoki na ye ya bokulutu. Wana ezali yo kokota na ebongiseli ozali koteka makoki na yo ya bokulutu, ndeko mobali, olinga kondima yango to te. Etonga nyonso ya Bamisioni oyo ebimaki pe nsima ezongi etekaki makoki na yango ya bokulutu, pe ntango oteki makoki na yo ya bokulutu, okokani mpenza na Esau—okoki kolela pe kobongola motema ndenge nyonso olingi, kasi ekosunga yo ata moke te. Likambo ya kosala ezali bobele moko pe yango oyo: “Bobima kati na ye, bato na ngai, pe bosangana lisusu te na masumu na ye!” Sikawa soki bokanisi te ete nalobi solo, na bongo boyanola motuna moko oyo. Moto nani oyo azali na bomoi akoki kotangela ngai lingomba to mosala ya Nzambe oyo ezua kolamuka pe ezonga, nsima na yango komikitisa na ebongiseli pe kokoma lingomba ya ebongiseli? Botanga lisituale. Bokoki kozua moko te—ata moko te.

Ezalaki katikati ya butu mpo na Yisalaele ntango basanganaki na mokili pe batikaki makambo ya Molimo mpo na kolanda oyo ya politiki. Ezalaki katikati ya butu na Nicée nde lingomba esalaki likambo yango moko. Ekomi katikati ya butu lelo ntango mangomba ezali kosangana.

Nzoka nde ntango Akaba abalaki Yezabele apesaki ye nzela ete azua mbongo ya leta mpo atonga tempelo minene mibale mpo na kosambela Astarte pe Bala. Oyo batongelaki Bala ezalaki monene penza mpo ete Yisalaele mobimba baya kosambela wana. Pe ntango Constantin abalanaki na lingomba apesaki lingomba bandako ya losambo, pe atiaki bitumbelo pe bikeko, pe abongisaki bolandani ya bokonzi oyo esi ebandaki kozua lolenge.

Ntango Yezabele azuaki bokonzi ya leta na nsima na ye akotisaki losambo na ye na makasi likolo na bato pe abomaki basakoli pe banganga–Nzambe. Ekomaki mabe koleka na lolenge ete, Eliya, motindami na ntango wana, akanisaki ete atikalaki bobele ye moko; kasi Nzambe azalaki na bato 7.000 oyo bafukamelaki Bala te. Pe sikawa kati na mangomba oyo ebongisami ya Babatiste, ya Bametodiste, ya Bapresbiterien, pe bongo na bongo, ezali na bato oyo bakobima pe bakozonga epai na Nzambe. Nalingi boyeba ete sikawa nazali kotelemela bato te, pe naino nasala yango soko moke te. Natelemelaka nde lingomba oyo ebongisami – lolenge ya makanisi ya ebongiseli. Nasengeli kotelemela yango mpamba te Nzambe ayini yango.

Tika totelema mwa moke awa mpo tozongela oyo tolobaki na ntina na kosambela na Twatila. Nalobaki ete bazalaki kosambela Apollo (oyo azalaki nzambe moi) elongo na mokonzi. Bongo Apollo yango abengamaki ‘molongoli na mabe.’ Azalaki kotinda mabe mosika na bato. Azalaki wana mpo na kopambola bango pe azalaki nzambe mpenza mpo na bango. Asengelaki kozala molakisi na bato. Azalaki kolimbolela lolenge ya kosambela, milulu ya tempelo, kosambela banzambe, ntina na mbeka, liwa pe bomoi nsima na liwa. Azalaki kosala yango na nzela na mosakoli ya mwasi oyo azalaki kosenzwa ntango afandi na kiti oyo ezalaki na makolo misato. Olala! Bomoni yango? Mwasi mosakoli yango abengami awa Yezabele pe azali koteya bato. Pe malakisi na ye ezali

kopengwisa baombo na Nzambe pe ezali kosalisa bango pite. Bongo pite elingi koloba 'kosambela bikeko.' Oyo nde ndimbola na yango ya molimo. Ezali lisanga oyo ekeseni na mobeko. Lisanga ya Akaba pe lisanga ya Constantin, nyonso mibale ekeseneki na mobeko. Bango nyonso mibale basalaki pite ya molimo. Basali nyonso na pite bakosuka na libeke na moto. Nzambe alobi bongo.

Na bongo, malakisi ya Lingomba Katoliko (lingomba ezali na bomwasi, ezali mwasi) ezali kowangana Liloba na Nzambe. Papa oyo azali mpenza Apollo ya mikolo oyo ateyi bato ete basangana na bikeko. Lingomba ya Roma ekomi sikawa mwasi mosakoli ya lokuta mpo na bato, mpo ete alongoli Liloba na Nkolo epai na bato pe apesi bango makanisi na ye moko na oyo etali kolimbisama na masumu, oyo etali eloko ememaka mapamboli na Nzambe; pe banganganzambe bakei mosika kino koloba na nko ete bazali na nguya bobele kati na bomoi te kasi pe kati na liwa. Bazali koteya na ndenge na bango moko ete epongelo ezali, kasi okoki komona yango kati na Liloba te. Bazali koteya ete mabondeli, misa pe misolo ekoki kobimisa yo na epongelo pe kokotisa yo na lola. Mobimba ya makambo oyo etongami likolo ya malakisi na ye ezali lokuta. Etongami te likolo ya moboko ngui ya Emoniseli ya Nzambe kati na Liloba na Ye kasi etongami likolo ya zelo oyo ezali koningana pe kozindisa, ya lokuta na ye ya bozabolo.

Lingomba elekaki mbala moko longwa na ebongiseli pe ekomi lingomba ebongisami pe uta wana ekomi na malakisi ya lokuta. Ezali solo. Bakatoliko ya Roma bandimaka te ete Nzambe azali kati na Liloba na Ye. Te mesie. Soki bandimaka mbele balingaki kobongola mitema pe kozonga nsima, kasi balobaka ete Nzambe azali kati na lingomba na Ye. Yango ekokomisa Biblia lisolo ya Lingomba Katoliko. Ezali bongo te. Botala oyo basali bobele na libatisi ya mai. Balongoli yango Libatisi ya Baklisto pe bakomisi yango oyo ya bapagano na bibiangelo. Nakoyebisa bino likambo moko oyo ekomelaki ngai na sánzó moko ya Katoliko. Elenge mwasi moko oyo nabatisaka akomaki Mokatoliko, na bongo sango alingaki kosolola na ngai na ntina na ye. Atunaki lolenge ya libatisi nini azwaki. Nayebisaki ye ete nabatisaki ye libatisi ya Baklisto oyo ezali lolenge se moko ya libatisi, na boyebi na ngai. Nakundaki ye na mai na

Nkombo ya Nkolo Yesu Klisto. Sángó amonisaki ngai ete na ntango moko Lingomba Katoliko ezalaki kosala bongo. Mbala moko natunaki ye ntango nini Lingomba Katoliko ezalaki kosala bongo, zambi natanga masolo na bango pe nakokaki komona te oyo ye alobaki. Ayebisaki ngai ete ezwami kati na Biblia, pe Yesu nde abongisaki Lingomba Katoliko. Natunaki ye soki azalaki kondima ete Petelo azalaki mpenza papa ya liboso. Alobaki na makasi nyonso ete Petelo azalaki yango. Natunaki ye soki bazalaki kosala misa na latin mpo na koyeba solo ete misa ezalaki kosalema na ndenge elongobani pe ekokaki kobongwana soko moke te. Alobaki ete yango ezali solo. Nayebisaki ye ete nakanisi bakei mosika mingi na oyo bazalaki na yango na ebandeli. Nayebisaki ye ete soki Lingomba Katoliko ezalaki kondima solo mpenza Buku ya Misala, na bongo ngai nazalaki Mokatoliko ya lolenge ya kalakala. Ayebisaki ngai ete Biblia ezali lisituale ya Lingomba Katoliko pe ete Nzambe azali kati na lingomba. Nandimelaki ye te mpamba te Nzambe azali kati na Liloba na Ye. Tika ete Nzambe azala sembo kasi moto nyonso azala moto na lokuta. Soki olongoli to obakisi eloko moko na Buku oyo, Nzambe alakaki ete Akobakisa bitumbu na baoyo bakobakisa pe Akolongola likabo na bango na Buku na Bomo soki bameki kolongola eloko moko kati na yango. Emoniseli 22:18,19.

Nakotalisa ndenge nini Lingomba Katoliko ya Roma endimaka ete Nzambe azali kati na lingomba kasi na Liloba te. Tala mwa maloba ekamatami na zulunale ya Pápa Yoane 23. “Makambo nabikeli na mibu misato oyo na mosala ya Pápa, ‘na kobanga pe kolenga’, uta nandimaki mosala oyo na botosi nyonso ya *Mokano na Nkolo, oyo epesamelaki ngai na nzela na Etonga ya Bulee ya ba-Kardinale*, ezali kotatola na ntina na bosolo oyo pe ezali ntina ya libela oyo ezali kotinda ngai natikala sembo na yango; kotia motema mobimba epai na Nzambe, na nyonso oyo etaleli lelo, pe na kimia oyo ebongi be ya mambi makoya nsima.” Pápa oyo azali koloba ete Nzambe alobaki na nzela na lingomba mpo na komonisa mokano na Ye. Lokuta nini oyo. Nzambe azali kati na Liloba na Ye pe Azali koloba na nzela ya Liloba mpo na komonisa mokano na Ye. Alobaki lisusu ete atiaki motema mobimba na maloba na bato pe na

bongo atosaki yango na kimia mpenza. Maloba yango eyokani kitoko mingi kasi ezali mpenza lokuta. Ekokani mpenza na libebi kati na Elanga na Edeni.

Sikawa toleka awa na Emoniseli 17 pe tomona mwasi oyo, lingomba, oyo azali kobika na masakoli ya lokuta kasi na Liloba na Nzambe te. Na molongo 1 Nzambe abengi ye mwasi monene na pite. Mpo na nini azali mwasi na pite? Mpo ete azali kosambela bikeko. Azui batu pe amemi bango na likambo yango moko. Nkisi mpo na kosambela bikeko ezali nini? Liloba na Nzambe. Na bongo mwasi oyo azali mwasi na pite mpo ete atiki Liloba. Ye wana afandi likolo na mai mingi, oyo elingi koloba ebele na bato. Esengeli kozala solo mpenza lingomba ya lokuta mpo ete lingomba na Nzambe ezali moke – baoyo bakomona yango bazali moke.

Botala malamumu ndenge azali komonana na miso na Nzambe, atako azali komonana malamumu mingi na miso na bato pe azali komonana na bwanya. Alangwi na mbindo ya pite na ye. Nzokande alangwaki na makila na baoyo babomamaki. Ndenge moko lokola Yezabele oyo abomaki basakoli pe banganzambe pe asilisaki libota na Nzambe oyo baboyaki kogumbamela pe kosambela Bala. Yango mpenza nde Lingomba Katoliko esalaki. Babomaki baoyo baboyaki komikitisa na nse ya bokonzi ya papa. Baoyo balingaki Liloba na Nzambe na esika na maloba na bato babomaki bango, mbala mingi na ndenge ya somo. Kasi lingomba oyo emikotisasi na koboma bato yango moko ezalaki ya kokufa pe eyebaki yango te. Bomoyi ezalaki kati na ye te pe bilembo ezalaki kobila yango soko moke te.

NTANGO MPO NA KOBONGOLA MOTEMA

Emoniseli 2:21 “Napesi ye ntango ete abongola motema, nde azalaki na mposa na kobongola motema, na pite na ye te.” Boyebi ete lingomba oyo ezalaki solo mabe koleka Akaba? Boyebi ete Akaba abongolaki motema mpo na ntango moke pe atambolaki na limemia liboso na Nzambe? Bokoki koloba bongo te na Lingomba Katoliko ya Roma. Te mesie. Abongoli motema ata moke te kasi na moto makasi na ye azalaki koboma baoyo nyonso bamekaki kosunga ye ete abongola

motema. Yango nde lisituale. Bongo Nzambe atikaki te kotelemisa bobele batindami na eleko moko na moko kasi Atelemisi pe basungi mosusu malamumu mpenza mpo na kosunga batindami yango. Apesaki na eleko moko na moko bato na Nzambe ya malamumu mpenza pe basalaki nyonso bakokaki kosala mpo na kozongisa lingomba epai na Nzambe. Na ntembe te Nzambe apesaki ye libaku pe lisungi mpo na kobongola motema. Asila kobongola motema pe kotalisa yango na nzela ya mbuma na ye? Te mesie. Abongola motema ata moke te pe akobongola motema ata moke te. Alangwi. Abungisi mayele na ye na makambo ya molimo.

Sikawa bobulungana te pe bobanda kokanisa te ete Lingomba ya Roma abongola motema na lolenge aboma basantu mpo azali komeka kosangana na bamissioni wana ezali ye kokokanisa bindimeli na ye na bindimeli ya bamissioni. Ata mbala moko te asenga bolimbisi pe andima ete asala mabe na ebele na bato aboma. Akosenga pe bolimbisi te. Atako azali komonana na boboto pe na bolamu na ntango oyo, akotelema lisusu mpo na koboma, mpamba te koboma efandi kati na motema na ye ya mabe oyo ebongwanaka te.

EKATELI OYO EPESAMELI MWASI NA PITE

Emoniseli 2:22–23 “Tala, nakobwaka ye na mbeto, pe baoyo basali na ye ekobo, kati na mpasi monene, soko bakobongola mitema na misala na ye te. Nakoboma bana na ye na liwa; bongo mangomba nyonso beikoyeba ete Ngai nazali Moto oyo atalaka na nse ya mitema, pe ayebi makanisi na bato, pe Nakopesa bino lokola ebongi na misala na moto na moto.”

Nini? Mwasi oyo azali na bana? Pe azali mwasi na pite? Soki ezali ya solo ete aboti bana uta na pite na ye, na bongo asengeli kozikisama na moto ndenge Liloba elobi. Yango ezali solo mpenza. Yango nde suka na ye mpo akozikisama na moto. Suka na ye nde libeke na moto. Kasi totelema pe tokanisa na ntina na bana oyo mwa moke. Mwasi nde moto oyo bana babimaka na nzela na ye. Emonani polele ete mwasi oyo azalaki na bana oyo babimaki na nzela na ye kasi basali bobele likambo oyo ye asalaki. Botalisa ngai lingomba moko oyo esila kobima na ebongiseli pe ezanga kozonga kati na yango. Ata moko ezali te.

Ata moko te. Balutherien babimaki, pe mbala moko basalaki lisusu ebongiseli pe lelo oyo basimbani loboko na loboko na lisanga oyo ya mangomba nyonso. Bamethodiste babimaki pe mbala moko basalaki lisusu ebongiseli. Bapentekotiste babimaki pe mbala moko basalaki lisusu ebongiseli. Bamosusu pe bakobima, kasi nkembo na Nzambe, bakosala lisusu ebongiseli te mpo ete bayebi solo. Etonga yango ekozala mwasi na libala ya ntango na suka.

Bongo elobami awa ete mwasi na pite oyo azalaki na bana. Kasi bazalaki banani? Bazalaki bana basi, mpo ete bazalaki mangomba lokola ye. Sikawa likambo ya motuya mingi yango oyo. Yezabele na Akaba babotaki mwana mwasi. Mwana yango abalanaki na Yolama mwana ya Yosafata pe na buku ya Mikonzi Mibale 8:16 elobami ete “Yolama abilaki nzela ya bokilo na ye.” Akotaki mbala moko na kosambela bikeko na nzela na libala oyo. Amemaki Yuda oyo azalaki kobanga pe kosambela Nzambe kati na kosambela bikeko. Yango mpenza nde likambo mangomba–bana basi nyonso basalaki, lokola nauti kotalisa bino. Babandaka na bosolo pe bamikotisaka na bibongiseli na nzela ya libala pe bazali kotika Liloba mpo na kokota na momesano, bindimeli pe bongo na bongo. Sikawa nalingi kotalisa bino polele likambo oyo. Na Baebele 13:7, elobami: “Botosa baoyo bakokambaka bino, baoyo basololi Liloba na Nzambe epai na bino.” Liloba nde ezali kokamba biso, bato te. Bongo mobali lokola mobali na libala azali mokonzi na mwasi. Azali kokamba ye. Kasi lingomba ezali pe mwasi, lokola, pe mokambi na yango ezali Liloba. Yesu azali Liloba. Soki abwaki Liloba pe azwi mokonzi mosusu azali mwasi na ekobo. Sikawa botangela ngai lingomba moko oyo etika Liloba te mpo na bonkoko pe bindimeli. Bango nyonso bazali basi na ekobo—ndenge mama azali, ndenge mwana mwasi azali.

Etumbu nini mwasi na pite pe bana na ye bakozwa? Boye, ekozala na biteni mibale. Ya liboso Alobi: “Nakobwaka ye na mbeto.” Kokokana na eteni ya suka ya molongo 22 ekozala mbeto ya mpasi monene, to ya mpasi monene koleka. Yango nde oyo Yesu alobaki na Matai 25:1–13. Bangondo bazalaki zomi. Mitano bazalaki na mayele pe mitano bazalaki bilema. Mitano ya mayele bazalaki na mafuta (Molimo Mosantu) kasi mitano mosusu bazalaki na yango te. Ntango mongongo eyokani:

“Tala Mobali na libala,” mitano ya bilema basengelaki kokende mbangu koluka mafuta na ntango yango bangondo mitano ya mayele bakotaki mpo na libala. Mitano oyo batikalaki libanda batikalaki mpo na mpasi monene koleka. Yango nde ekokomela baoyo nyonso bakokende na konetolama te. Yango nde ekokomela mwasi na pite na bana na ye ya basi. Ya mibale, elobami ete Akoboma bango na liwa to lokola ndimbola ya liloba moko na moko elobi: “Tika ete babomama na liwa.” Maloba oyo ezali kokamwisa. Tokoki koloba: “Tika moto abomama na nsinga na kingo, to na lotiliki to pe na lolenge mosusu.” Kasi oyo elobi: “Tika ete babomama na liwa.” Liwa yango moko nde ntina ya liwa na bango. Sikawa nalingaki ete bomona yango polele na bongo nakozongela etaliseli na biso ya mwana mwasi na Yezabele oyo akotaki na ndako na Yuda na nzela ya libala pe na bongo amemaki bango mbala moko na losambo ya bikeko oyo esalaki ete Nzambe akaba Yuda na liwa. Yango nde likambo Balame pe asalaki. Na bongo Yezabele azalaki awa na bopagano na ye. Na ngambo mosusu Yuda azalaki kosambela Nzambe na ndenge ebongi pe kobika kokokana na Liloba. Na bongo Yezabele abalisi mwana na ye ya mwasi na Yolama. Bobele na ntango esalemi, Yolama amemi bato bakoma basambeli na bikeko. Bobele ntango libala oyo esalemaki, Yuda akufaki. Liwa ya molimo ekotaki. Bobele ntango lingomba ya liboso ya Roma emibongisaki, ekufaki. Bobele ntango Balutherien bamibongisaki, liwa ekotaki pe bakufaki. Na suka Bapentekotiste bayaki pe bamibongisaki. Molimo akendeki, atako bazali kondima yango te. Kasi Akendeki. Libala yango ememaki liwa. Na nsima pole ya bamoko na Bonzambe eyaki. Bango pe bamibongisaki pe bakufaki lokola. Pe nsima na moto na Nzambe kokita na Ebale ya Ohio na mobu 1933 kolamuka ya lobiko na nzoto epalanganaki na mokili mobimba, kasi eyaki na nzela na ebongiseli moko te. Nzambe abimaki libanda ya bitonga ya Bapentekotiste, libanda ya komibongisa pe oyo Ye akosala na mikolo ekoya ekozala pe libanda ya kobongisama. Nzambe akoki kosala na nzela ya bakufi te. Akoki kosala bobele na nzela ya bato na BOMOI. Bato yango ya bomoi bazali libanda na Babele.

Boye bomoni, “Liwa” to “Ebongiseli” ekotaki, pe lingomba ekufaki, to mpo na komonisa yango polele koleka liwa ezwaki esika epai wapi

ntango moke liboso BOMOI nde ezalaki kokonza. Ndenge Eva ya ebandeli amemelaki bato liwa, na bongo pe ebongiseli ememaki liwa, mpamba te ebongiseli ezali mbano ya babebisi mibale: Bonikolaite pe Bobalami, oyo epalanganisamaki na mwasi mosakoli Yezabele. Nzoka nde Eva asengelaki kozikisama elongo na nyoka na ntina na likambo mabe basalaki. Kasi Adamu akotaki na likambo yango, pe mbala moko azwaki ye mpo ete abikisama. Kasi ntango losambo oyo ya Satana ekokoma ma suka ya mobembo na yango kati na bileko, moto ata moko te akokota na likambo na ye, pe akozikisama elongo na mopengwisi na ye, mpamba te mwasi na pite na bana na ye na motemeli ya Klisto pe Satana bakozwa esika na bango kati na libeke na moto.

Awa nalingi koleka liboso pe esengeli mbala mosusu nabomba likambo oyo mpo na nsango etali eleko na suka, kasi emonani malamau ete naloba yango sikawa mpo ete ezali koloba polele mpenza likolo na ebongiseli pe eloko nini ekosalema na nzela na yango. Pe nalingi kokebisa bino. Emoniseli 13:1-18 "Namonaki nyama kobima na mai monene. Azalaki na maseke zomi, na mito sambo, pe na maseke na ye mitole na bokonzi zomi, pe na mito na ye nkombo na kotuka. Nyama oyo namoni azalaki na motindo na nkoi, makolo na ye lokola makolo na ngombolo, pe monoko na ye lokola monoko na nkosi. Dalagona apesi ye nguya na ye, na kiti na bokonzi na ye, na bokonzi monene. Moko na kati na mito na ye ezalaki lokola soko ezokaki kino kufa, nde mpota na ye na kufa ebikaki. Mokili mobimba ekamwi pe ebilaki nyama. Bato basambelaki dalagona mpo ete ye apesaki nguya na nyama, pe basambelaki nyama koloba ete, Nani akokani na nyama? Nani akoki kobunda na ye? Monoko na kosolola makambo minene na bitukeli epesami na ye, bokonzi pe epesami na ye mpo na kosala misala sanza ntuku minei na mibale. Azipoli monoko na ye na kotuka Nzambe, pe atuki nkombo na Ye, na efandelo na Ye, pe baoyo bafandi kati na likolo. Nguya epesami na ye na kobunda etumba na bapetwi pe koleka bango. Bokonzi pe epesami na ye na liboso na mikili nyonso, na bibolo nyonso, na minoko nyonso, na mabota nyonso. Bato nyonso bafandi na mokili bakosambela ye, baoyo nkombo na bango ikomami te, longwa na bozalisi na mokili, na Buku na Bomoi na Mwana na Mpate oyo asili

kobomama. Soko moto moko azali na litoi ayoka. Soko eponami ete moto moko akangama, mbe akangama. Soko moto abomi na mopanga, ekoki na ye kobomama na mopanga. Oyo awa ntina na mpiko pe na kondima na bapetwi. Namoni nyama mosusu kobuta, kobima na kati na mokili; azalaki na maseke mibale lokola mwana na mpate, nde asololi lokola dalagona. Akosalaka na bokonzi na nyama, na liboso na miso na ye wana. Abiangi mokili na bafandi na yango kosambela nyama na liboso, oyo mpota na ye na kufa esili kobika. Asali pe bilembo minene, bongo abimisi ata móto na likolo, kokitisa yango na nse na miso na bato. Azimbisi bafandi na mokili mpo na bilembo oyo azui nguya na kosala na miso na nyama, koloba na bafandi na mokili ete basala ekeko mpo na nyama, oyo azoki mpota na mopanga nde abiki. Nguya epesami na ye ete apesa bomoi na ekeko na nyama, ntina ete ekeko na nyama esolola, pe ete bato nyonso baoyo baboi kosambela ekeko na nyama babomama. Abimisi mobeko ete bato mike na bato minene, na bazui, na babola, na bansomi na baombo, batiamama elembo na loboko na bango na mobali soko na elongi, boye moto akoki kosomba to koteka te soko azangi elembo na nkombo na nyama soko motuya na nkombo na ye. Mayele na yango oyo: moto na kososola atanga motuya na nkombo na nyama, mpo ete ezali motuya na moto. Motuya na ye, nkama motoba na ntuku motoba na motoba.”

Mokapo oyo ezali kotalisa nguya ya Lingomba Katoliko ya Roma pe nini ekosala na nzela ya ebongiseli. Bomikanisela ete yango ezali mowiti ya lokuta. Ata soki atangi Nkombo na Nkolo, azali kosala yango kaka na lokuta. Bokonzi na ye ezali ya Nkolo te kasi ya Satana. Akosuka kaka na komikokanisa mobimba na nyama. Mwasi na pite oyo amati likolo na nyama motane azali kotalisa polele ete nguya na ye ezali nde nzambe ya nko (Satana) kasi Nzambe na biso te, Nkolo Yesu Klisto.

Na eteni ya 17, emonani polele ete akozwa bokonzi nyonso likolo na mombongo ya mokili mobimba, mpamba te moto moko te akoki kosomba to koteka soko na nzela na ye te. Yango etatolami na Emoniseli 18:9–17, oyo ezali kotalisa boyokani na ye na bakonzi, bana na bakonzi, bato na mombongo, baoyo nyonso bazali na boyokani na Roma pe na mombongo.

Na Emoniseli 13:14, tomoni ete nyama azali kopalanganisa bokonzi na ye na nzela ya elilingi oyo basalelaki ye. Elilingi oyo esalemi, ezali nde lisanga ya mangomba ya mokili mobimba, oyo kati na yango mangomba nyonso oyo ebongisami ekosangana na Bakatoliko ya Roma (bazali kosala yango ata sikawa.) Ekoki pe kozala ete lisanga oyo ekosalema mpo na kosukisa nguya ya communisme. Kasi mpo ete communisme, lokola Nebukadanesala, etelemisamaki mpo na kozikisa nzoto ya mwasi na pite, Roma ekolongama pe ekobebisama. Boyeba yango malamumu ete bisika nyonso oyo lingomba ya Roma ezalaki kokende, communisme ezalaki kolanda. Esengeli kozala bongo. Botika nakebisa bino sikawa, bokanisa te ete communisme nde ezali monguna na bino. Te mesie. Ezali pe Lingomba Katoliko, ya koleka kutu.

Sikawa totanga Emoniseli 13:1-4, pe tokanisa yango na Emoniseli 12:1-5. Emoniseli 13:1-4: "Namonaki nyama kobima na mai monene. Azalaki na maseke zomi, na mito nsambo, pe na maseke na ye mitole na bokonzi zomi, pe na mito na ye nkombo na kotuka. Nyama oyo namoni azalaki na motindo na nkoi, makolo na ye lokola makolo na ngombolo, pe monoko na ye lokola monoko na nkosi. Dalagona apesi ye nguya na ye, na kiti na bokonzi na ye, na bokonzi monene. Moko na kati na mito na ye ezalaki lokola soko ezokaki kino kufa, nde mpota na mito na ye na kufa ebikaki. Mokili mobimba ekamwi pe ebilaki nyama. Bato basambelaki dalagona mpo ete ye apesaki nguya na nyama, pe basambelaki nyama koloba ete, Nani akokani na nyama? Nani akoki kobunda na ye?" Emoniseli 12:1-5. "Elembo monene emonanaki kati na likolo: mwasi oyo asili kolata moi, pe sanza ezalaki na nse na matambe na ye, na motole na mioto zomi na mibale na motó na ye. Azalaki na zemi, pe agangi na mpasi pe na bolozi na ye mpo na kobota. Elembo mosusu emonanaki na likolo: dalagona motane monene, oyo azalaki na mito nsambo na maseke zomi, pe na mito na ye mitole na bokonzi nsambo. Mokondo na ye ebendi ndambo na misato na mioto na likolo, pe ebwaki yango na mokili. Dalagona atelembi liboso na mwasi oyo alingi kobota, na ntina ete alia mwana na ye, soko aboti ntango nini. Aboti mwana mobali, oyo akokengela mabota nyonso na mpimbo na ebende, pe mwana na ye akamatami na likolo epai na Nzambe, na kati na bokonzi na Ye."

Satana pe losambo na ye ya Satana bazali kati na nyama mibale oyo. Na Emoniseli 14, nyama oyo ezokaki lokola kino na kufa nde mpota na ye ya kufa ebikaki ezali nde Roma ya bokonzi ya bapagano oyo ekweaki na kobundisama ya basenzi, pe uta na yango ebungisaki nguya na yango mpo na mwa ntango. Kasi ezwaki bokonzi yango lisusu na Roma oyo ya bapápa. Bomoni yango? Ekolo oyo ezalaki kokonza na koniataka nyonso, pe ekomaki bokonzi oyo elekaki makasi, esukaki na kozoka mpota ya kufa. Nguya na ye ya nzoto mpo na kokonza na nzela ya mampinga pe bongo na bongo esilaki. Kasi na ntango ya Constantin azongaki na bomoi, mpamba te Roma ya bapápa emikotisaki na mokili mobimba, pe nguya na ye ezali na ndelo te. Asalelaka bakonzi pe bato na mombongo pe na makasi na ye na misolo pe na losambo na ye ya koboma azali kokonza lokola nzambe mwasi ya eleko oyo. Azali pe dalagona oyo azalaki kozela kolia mwana mobali wana. Elode amekaki koboma Nkolo Yesu kasi pe alongaki te. Na nsima Yesu abakemaki na ekulusu na basoda ya Roma, kasi sikawa Anetolami kino na kiti ya bokonzi.

Na oyo nauti koloba, bomikanisela emononeli ya Daniele. Eteni ya suka ya ekeko, nguya ya suka kati na mokili ezalaki kati na makolo. Ezalaki ebende pe mabele. Bomoni ete ebende ezali nde Bokonzi ya Roma. Kasi sikawa ezali lisusu ebende ya makasi te. Mabele esangisami na yango. Nzoka nde ezali wana pe ezali kotambwisa makambo ya mokili kati na bikolo ya demokrasia pe kati na bikolo ya bokonzi na nko koleka. Lingomba Katoliko ezali na bikolo nyonso. Esangisami kati na yango nyonso.

Nalingi koloba na bino likambo moke likolo na ebende pe mabele. Bomikanisela ntango Krouchtchev abetaki sapato na ye likolo ya mesa na O.N.U.? Boye, bikolo mitano ya ebimelo na ntango ezalaki wana pe bikolo mitano ya elimwelo na ntango. Krouchtchev alobaki mpo na bikolo ya Ebimelo na ntango pe mokonzi Eisenhower mpo na bikolo ya Elimwelo na ntango. Na lokota ya Russie, Krouchtchev elingi koloba mabele pe Eisenhower elingi koloba ebende. Bakambi minene mibale

ya mokili, misapi minene mibale ya makolo ya ebende na mabele, bafandaki moko pembeni na moninga. Tokomi na suka ya makambo nyonso.

Na eteni ya 4, etunami: “Nani akoki kobunda na nyama?” Sikawa lelo oyo bankombo ya lokumu ezali na mokili. Bikolo ya nguya ezali, kasi sikasikawa Roma nde azali kotambwisa. Pápa nde azali kokamba. Pe nguya na ye ekokola. Moto moko te akoki kobunda na ye.

Eteni ya 6: “Azipoli monoko na ye na kotuka.” (Kolakisaka mateyo oyo ezali mibeko ya bato, bato na nkanda, bavimbi na lolendo, baoyo balingaka bisengo, baoyo bazali na lolenge ya kosambela nde bazali koangana nguya na yango.) Azalaki kotuka Nkombo na Nzambe—kokitanisa Nkombo oyo na bibiangelo pe koboya kosala ndenge mosusu.

Eteni ya 7: “Pe nguya epesami na ye na kobunda etumba na bapetwi.” Minyoko—liwa mpo na mondimi ya solo pe nyonso wana na Nkombo na Nkolo na ntina ete Nkombo na Nzambe etukama, ndenge ezali kotukama na Russie, na ntina na oyo losambo Katoliko esala kuna.

Eteni ya 8: “Pe bato nyonso bafandi na mokili (Baoyo nyonso nkombo na bango ekomami te longwa na bozalisi na mokili na Buku na Bomoi ya Mwana Mpate oyo asili kobomama) bakosambela ye.”


Totondi Nzambe mpo ete bampate bakosambela ye te. Bansa bakopengwisama longola bobele baponami. Kasi bango bakopengwisama te. Mpamba te bayokaka mongongo ya Mobateli na mpate pe balandaka Ye.

Bongo sikawa, botala likambo oyo, yango nde tozali komeka kotalisa bino. Momboto na liwa oyo ebandaki na eleko ya liboso—momboto oyo ya ebongiseli, ekoli pe na suka ekomi nzete oyo bandeke nyonso ya mbindo bafandi kati na yango. Atako azali komikumisa ete azali mopesi na bomoi, azali nde mopesi na liwa. Mbuma na ye ezali LIWA. Baoyo basangani na ye bakufi. Lisanga oyo ya nguya ya mangomba ya mokili, oyo ezali kokosa mokili ete kati na ye lobiko na nzoto pe ya molimo ezali, ezali kopengwisa pe kobebisa ebele na bato. Azali bobele kufa

oyo emonisami na nzoto te, kasi ekelamu oyo ya kufa ya kopola yango moko ekobomama na nzela ya liwa oyo ezali libeke na moto. Oo, soki bato bakoki kososola ndenge nini suka na bango ekozala soki batikali kati na ye. “Bobima kati na ye, mpo na nini bokokufa?”

LIKEBISI YA SUKA

Emoniseli 2:23: “Nakoboma bana na ye na liwa. Bongo mangomba nyonso bakoyeba ete Ngai nazali Moto oyo atalaka na se ya mitema, pe ayebi makanisi na bato, pe na kopesa bino lokola ebongi na misala na moto na moto.”

Nzambe atalaka motema. Yango ebongwana soko moke te. Ekobongwana pe soko moke te. Awa, lokola kati na bileko nyonso bitonga bizali mibale, nyonso mibale ezali koloba ete ezuaka emoniseli na yango epai na Nzambe pe ezali na boyokani na Nzambe. “Nde moboko na Nzambe ezali kotelema ngwi, ekomami na elemba pe ete, *Nkolo ayebi bato na Ye.*” Mibale Timote 2:19. “Nkolo atalaka na nse ya mitema.” Liloba oyo ‘kotala na nse ya’ elingi koloba ‘kolandela’ to ‘kolanda na bokebi.’ Nzambe alandelaka makanisi na biso (mitema); Ayebi eloko nini ezali kati na mitema na biso. Azali komona misala na biso oyo ezali komonisa polele oyo ezali kati na biso. Motema nde esika boyengebene to mabe ewutaka. Bantina na biso, miango na biso—Ayebi yango nyonso mpamba te Atalaka misala nyonso. Mosala moko na moko, liloba moko na moko ekoleka na kosambisama ntango tokoyanola mpo na bomoi na biso. Kobanga Nzambe ezalaki te epai na mowiti ya lokuta pe bakomona bwale. Tika ete baoyo nyonso batangaka Nkombo na Ye, babika lokola ekoki na babulami. Tokoki kokosa bato kasi tokokoka kokosa Nkolo soko moke te. 

Nsango oyo na Ndeko William Marrion Branham, ebengami *Mwasi Yango Yezabele*, ekamatami na mokapo ya Eleko na Lingomba na Tuatila ya buku na ye oyo ebengami *Botalisami ya Bileko Nsambo na Lingomba*, ekomami awa mobimba pe ekabolami na Voice of God Recordings.

LINGALA

©2010 VGR, ALL RIGHTS RESERVED

Mateya ya Ndeko William Marrion Branham ekangamaki liboso na babande, tozali na mateya koleka 1100. Tozali na ebele ya mateya yango na lolenge ya buku, ekomami mobimba. Okoki kozwa ba-bande, ba-CD, babuku, ba-film, ba-photo, pe soko olingi koyeba malamu makambo matali mosala na ye na mokili mobimba, okoki kokoma na:

LA VOIX DE DIEU, bureau de la francophonie
3435, boulevard Sainte-Rose Laval (Québec) CANADA H7R 1T7

VOICE OF GOD RECORDINGS
P.O. Box 950, Jeffersonville, Indiana 47131 U.S.A.

www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiamana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, koméla:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org